

MME EDISINE-ŊKPỌ MME OKU ISRAEL

Exodus 28:1-43; 29:29, 30; 39:1-31

QYQHỌ UKPEP-ŊKPỌ 97

Eke Mkparawa

IKỌ IBUOT: “Nyedat esit eti-eti ke Jehovah, . . . koro enye emesine mi edisine-ŋkpọ erinyaña ke idem” (Isaiah 61:10).

Ntiñenyin Abasi Ke Kpukpru Ŋkpọ Ekpri Nte Ekpekpri

Ke ini Abasi okowukde idaha oku ke ini ekebọpde Ataya ke akwa akai-ikọt, idighe akpan utom Aaron ye eke nditọ-iren esie ikpọn ke Enye eketiñ ọnọ Moses, edi ama etiñ nko abaña utọ edisine-ŋkpọ emi anade nte mmọ esine. Nnyin imokut ite ke Abasi ama enenere etiñ enyin ese ete ke enam kpukpru ŋkpọ ekem nte asañade ye Ikọ Esie. Ntre nko edi akpan ŋkpọ ọnọ nnyin mfin ndisaña ke kpukpru ukpep-ŋkpọ Nwede Abasi ekpekpri nte ekpekpri.

Edisine-ŋkpọ Aaron ye eke nditọ-iren esie ekenyene ndidi ndisana edisine-ŋkpọ, ndien baba owo efen ikanaha esine ukem edisine-ŋkpọ mmọ. Mfin esine nditọ Abasi utọ ŋkpọ mbana-idem emi nditọ ererimbot mikemeke nditiene nsine. “Enye emesine mi edisine-ŋkpọ erinyaña ke idem, amada ekura edinen ido ofuk mi” (Isaiah 61:10).

Abasi ama enyene ntak abaña nsio-nsio edisine-ŋkpọ emi mme oku ekesinede. Mmọ ekewut mfọn Abasi eke esit idem ndisana ikọt Abasi. Ana nte mmọ edi eke ediye linen, ndien John etiñ ọnọ nnyin ke Eriyarare ete ke ediye linen oro edi edinen ido nti ikọt Abasi. Edisine-ŋkpọ mmọ akana ada ọnọ “ubọn ye uyai.” Ke ini Peter eketiñde abaña mbana-idem nditọ Abasi, enye ọkọdọhọ ete “Ekubana idem enyọñ enyọñ. . . edi eda edisine-ŋkpọ eke midibiarake, kpa suñ-suñ spirit. . . ebana idem ke esit-esit uwem mbufo; koro oro edi se isọnde urua ke enyin Abasi” (I Peter 3:3, 4).

Mme Ekura Akwa Oku

Mme ekura akwa oku ema eye ekan eke mme oku eken. Enye ama enyene edisana utom emi okokponde akan ndinam nnọ Abasi, ndien akana nte edisana uwem esie okoñ akan. Ke ibuot esie enye ama ayara mitre. Ekedade ediye linen enam enye, enyūñ ewań ekanare ibuot esie nte ubọp-ibuot. Ke iso esie ekedi itiat nwe gold emi ekekapde mme ikọ emi, EDISANA ŊKPỌ JEHOVAH. Ini ekedede emi mme owo ekesede Akwa Oku, enyūñ ekutde itiat nwe gold oro, mmọ ekere ebaña edisana ido Abasi.

Nte utom emi Abasi okotde nnyin ete idinam okponde, kpa ntre ke ana nte itim iyak idem, ibọn akam, man nnyin ikpenyene Spirit Abasi, emi “edibanade” nnyin idem ọnọ utom oro. Edisine-ŋkpọ akwa oku emi ekedade ediye linen enam, ekedade gold ye nsio-nsio mbuaha uruk emi esemde edọk mmọ. Ekura oro ikenyeneke ubọk, edi ama ọsuhọre ekpere ndisim itọn-ukot. Ke isọn-isọn ema eyiri nkpri nkanika gold, edọk pomegranate esin ke mme ufọt nkpri nkanika emi. Baba owo efen ke ebede mme oku, ikenyeneke ndiduk ke Ataya, ndien nkpri nkanika oro ke ekura akwa oku emi ekenamde uyom nte enye asañade ema enam mmọ emi ebetde ke ańwa efiok ete ke enye ke uwem, ke onyūñ ananam mkpe-ubọk ke iso Abasi abaña mmọ.

Akwa oku ama esine ephod emi enamde ke “gold ye awawa, ye puple, ye ididuot, ye eti edifiak linen ke ubọk-usọ ọdọk-ọfọn” odor ke ekura emi. Ubak esie kiet ọkọnọ enye ke afara esie mbiba ke edem, ubak eken ke ikpanesit esie. Ekedade mkpaha-ukwak ekpaha edian ke afara kiet-kiet; ndien nko ke afara kiet-kiet itiat onyx kiet ama odu, enyūñ ekap enyiñ esien Israel itikiet ke itiat kiet, ye enyiñ itikiet ke itiat eken. Nditọ Israel ikenyeneke ndika ke iso Abasi ke idem mmọ, edi oku ekesibiom enyiñ mmọ ke mme afara esie ke ini odukde ke Edisana Ebiet.

Mbana-Ikpanesit

Oku ama obiom nko enyiñ nditọ Israel ke esit esie ke iso Jehovah ke mbiet mbana-ikpanesit emi itiat duopeba ekedude. Itiat kiet ama ọkpuhọre ye eken, enyūñ ekap enyiñ esien Israel kiet esin ke itiat kiet. Akwa oku ikpọn ekesine ephod ye nsọn-urua mbana-ikpanesit; ntre ke nnyin ikut ite ke Israel ekenyene ndiberi idem ke akwa oku ikpọn ke ndinam mkpe-ubọk ke iso Abasi. Do ke nnyin ikut nko nte emende Jesus efiak ewut ke mbiet akwa oku. Jesus ọkọdọk ke Heaven ndinam mkpe-ubọk ke iso Abasi nnọ ikọt Esie mi ke isọn.

Ata akpan itie ke edisine-ŋkpọ akwa oku ekedi Urim ye Thummim. Mme oku ekedade mmọ nkpọ emi efiok uduak Abasi. Baba owo kiet itimke ifiok nte mmọ eketiede, edi Abasi ama etiñ ọnọ Moses: “Ndien da Urim ye Thummim sin ke mbana-ikpanesit-ikpe; ndien mmọ eyedoro Aaron ke esit, ke ini enye odukde ke iso Jehovah, ndien Aaron edibiom ikpe nditọ Israel ke esit esie ke iso Jehovah kpukpru ini” (Exodus 28:30).

Abasi iketiñke ikọ ye mme oku nte ekesitiñde ọnọ Moses “iso ye iso.” Mmọ ekena eberi idem ke Urim ye Thummim man efiok uduak Abasi. Ke ediwak isua ema ekebe, ke eyo David, ke ini emi ekebe Jehovah mikoduhe

ke Ataya, usuñ emi ke ekeda efiok uduak Abasi. David ama ofiok ete ke Saul okoyom ndibọ imọ itie edidem, ndien enye okoyom ndifiok se Abasi oyomde imọ inam. Ntem enye okot Abiathar, oku, ete ada ephod edi man enye obup uyo Abasi. Abasi ama ọbọrọ enye ke Urim ye Thummim (I Samuel 23).

Enim ke akpanikọ ete ke Nditọ Israel nko ekeda usuñ emi efiok mme ewe esien ekenyene ndibem iso nkañwana ekọñ ye mbon Cannan, nte ewetde ke Judges 1:1, 2; ndien ke Judges 20:18; nnyin ikot, “Ekem mmọ edaha ke enyọñ edok ke Bethel, ekebup Abasi. Ndien nditọ Israel edọhọ. ete Mme anie owo nnyin edibem iso edok ekeñwana ekọñ ye nditọ Benjamin? Ndien Jehovah ọdọhọ ete, Judah edibem iso.” Edi ini kiet, ke ini Saul okobupde uyo Abasi, ke adañoro enye ama akanam idiok-ñkpọ, ikonohọ enye iborọ, “ke ndap, ye ke Urim, ye ke mme prophet” (I Samuel 28:6).

Sededi emi Urim ye Thummim ekedide, mmọ ekesiyarare uduak Abasi, enyuñ enọ akwa oku ifiok ndikpe ikpe Israel. Ubierikpe Abasi idighe “nte esede ke enyin, idinyuñ ibiereke ikọ nte okopde ke utọñ” (Isaiah 11:3). Enye ese esit onyuñ ekeme ndifiok me owo etiñ akpanikọ mme itiñke. Akwa oku ekedi ebierikpe ọnọ Israel, edi enye ekesiyom ifiok oto Abasi.

Udeme Nnyin Ke Ndinam Mkpẹ-Ubọk

Abasi emek ndida uyai edisana ido nsine nditọ Esie. Enye abana nnyin idem ke mbana ñkpọ eke Spirit; Enye amada ekura itoro ofuk nnyin. Ke ini oku odukde ediye edisana ebiet oro, emi ekedade ata ediye linen ye ata edisana gold enam man ada ukpono ọnọ Edisana Ebiet Jehovah, enye ekenyene ndisine edisana edisine-ñkpọ, man odot ndinam ñkpọ ke iso Jehovah. Didie ndien ke owo ekeme ndinam ñkpọ nnọ Jehovah ye edisine-ñkpọ eke edehede, ye ekura eke ọyọhọde ye idiok-ñkpọ? Edieke owo edide anam idiok-ñkpọ, enye inyenke unen ndinam baba ñkpọ kiet ke itie ukpono Abasi. Ofuri se enye enyenede ndinam edi ndibọñ akam erikabare esit ke nsuhore idem, “Abasi, tua mi, idiok owo, mbom.” Abasi eyekop utọ akam oro otode ke esit, ndien eyeyet kpukpru idiok-ñkpọ esie efep, onyuñ anam enye edi owo Abasi ye edisana edisine-ñkpọ.

Ke nnyin ibode erinam asana, etetim ebana nnyin ye Spirit Abasi, emi adade uyai edisana ido ọnọ nnyin. Abasi ọmọdion nnyin ke mme ñkpọ eke spirit, ndien Enye oyom nnyin inam ñkpọ Esie. Ana nte nnyin ibiom nditọ eka nnyin ke esit ke akam ke iso Abasi. Edieke mmọ edonode nnyin ibeñe Abasi ọkọk mmọ; ke ini mmọ edude ke inemesit, ana nnyin idara ye mmọ, ke mfuhọ mmọ nnyin itua ye mmọ inyuñ ibon akam man Abasi añwam mmọ ndibiom mbiomo mmọ. Inaha nte nnyin ibiom ke esit nnyin ke akam, mbon ufok nnyin me mmọ emi nnyin imade ikpon-ikpon, ana nte iñwam kpukpru nditọ Abasi. “Enyuñ ebọñ akam ebaña kiet eken. . . Mkpẹ-ubọk edinen owo enyene odudu eti-eti ndinam ñkpọ” (James 5:16).

Ndifiok

Ke ini Edisana Spirit odukde ke esit nnyin, ke inyuñ ibode baptism Edisana Spirit, Enye ọnọ nnyin eti ibuat ndifiok se idide nsu ye akpanikọ. Ke ini nnyin ibode erinyaña nnyin inyene udomo ifiok oro, ke ibode edinam asana ifiok oro otọñ ntak okpon. Edi nte nnyin isañade ikpere Abasi ke ima ikobọ baptism Edisana Spirit, Enye eyenam inyene eti ibuat eke okponde akan. Ana nnyin ibon akam eti-eti iyom Enye ekpep nnyin uduak Esie.

Nnyin iyomke ndikpe ikpe nnọ eyen-eka nnyin; Jesus edi Enye emi ekpede ikpe. Edi nnyin inimke ke akpanikọ se minenke, mme ndinyime nnọ mme ñkpọ oro Abasi asuade. Spirit Esie ekpep nnyin se idide akpanikọ onyuñ eteme nnyin usuñ edinen ido ye edisana ido akpanikọ. Nnyin imekeme ndifiok ini emi Spirit Abasi adade nnyin usuñ, minyuñ idighe Spirit asua, koro Spirit Abasi ye Ikọ Abasi esaña kiet.

Yak nnyin itim idu uwem man Abasi akpada Spirit Esie ọbọrọ nnyin, ukem nte mme oku ke eyo oko ekesifiokde uduak Abasi oto ke Urim ye Thummim.

MME MBUME

1. Tiñ nte edisine-ñkpọ mme oku eketiede.
2. Nso ke ekekap esin ke itiat ñwed gold mitre?
3. Nso ke afia linen ada ọnọ?
4. Ke nso utọ usuñ ke ekeme ndibana owo idem ke Spirit, mbemiso enye odot ndinam utom nnọ Abasi?
5. Nso ikedi Urim ye Thummim?
6. Nso idi Urim ye Thummim nnyin?